

Ҳазрати Абу Бакр (11-қисм)

16:26 / 21.04.2017 3926

СОЛИХ САЛАФЛАР ИБРАТИ

САҲОБАЛАР САЙИДИ

Абу Бакр Сиддиқ розияллоҳу анҳу ҳаётларидан лавҳалар

БАРАКОТ МҮЊЖИЗАСИ

(11-қисм)

Ҳазрат Абу Бакр розияллоҳу анҳу Расули акрам алайҳиссалоту васалламни ҳеч қачон ёлғиз қўймасдилар. Бир сафар улар кўчада қоладиган бўлишди. Қоронғулик тушарди. Улар нотаниш қишлоқ оралаб кетишарди. Бир уй олдида тўхтадилар. Ичкаридан уй соҳибасининг овози келди:

— Мусоғир эканлигингиз кўриниб турибди. Сизни меҳмон қилар эдим, аммо уйда ҳеч кимим йўқ. Бир оз нарироқда қабила бошлиғимизнинг уйи бор. Балки ўша ерга борарсизлар

Пайғамбаримиз соллаллоҳу алайҳи васаллам бир оз юрдилар ва нафасларини ростлаб олиш учун бир тўнка устига ўтиридилар. Бир оз вақт ўтгач, эчки подасини ҳайдаб бояги аёлнинг ўғли ҳам яйловдан қайтди. Бола уйга кириб чиқди-да, қўлида пичоқ тутганича улар томонга кела бошлади. Ҳазрат Абу Бакр розияллоҳу анҳу бу ҳолатдан ҳайратландилар. Бола эса яқин келгач:

— Онам менга сизларнинг мусоғир эканингизни айтди. Бизнинг эчкиларимиздан бошқа сизни меҳмон қилишга ҳеч нарсамиз йўқ. Пичоқни олинг, бир эчкини сўйинг. Мен сизга гўшт пишириб берай, – деди.

Расулуллоҳ соллаллоҳу алайҳи васаллам табассум билан:

— Пичоқни олиб бориб жойига қўй. Эчкингни эса келтир. Сут учун бир идиш ҳам ола кел, – дедилар.

Бола шошиб жавоб қилди:

— Менимча эчкини соғмоқчисиз. Афсуски, эчкиларимизнинг биронтаси ҳам сут бермайди. Улар сут берганида эди, ўзимиз соғиб сизларга икром

күрсатган бўлур эдик.

Пайғамбаримиз алайҳиссалом марҳамат қилдилар:

— Пичноқни жойига элтиб қўй. Идиш билан эчкингни бу ёққа олиб кел!

Бола изига қайтди. Бир оздан кейин қўлида сут соғиши учун идиш билан эчкини етаклаб чиқди. Расулуллоҳ ҳазратлари идитни олиб ерга қўйдилар ва эчкини соға бошладилар. Ҳалиги болакай эса ҳайратдан қотиб қолган эди. Кўз очиб-юмгунча сут бермайдиган эчкининг сути... идишни лиммолим тўлдирди. Расулуллоҳ соллаллоҳу алайҳи васаллам:

— Сутни ол-да, уйингга олиб бориб идитни бўшатиб чиқ, – дедилар.

Болакай тезгина бўшатиб чиқди. Расулуллоҳ соллаллоҳу алайҳи васаллам идитни олиб, яна сут соғишига тутиндилар. Бу сафар ҳам идиш сутга тўлди. Сарвари олам ҳамроҳларига марҳамат қилдилар:

— Ичинг, ё Абу Бакр, қона-қона ичинг.

Ҳазрат Абу Бакр бу ҳақда шундай деганлар:

— Иккинчи маротаба соғилган сутдан мен ҳам, Расулуллоҳ соллаллоҳу алайҳи васаллам ҳам ичдилар, тўйдик. Кейин қўлларини дуога очиб ҳалиги аёл ўғли ҳақига эчкиларининг барака келтиришини, сутининг мўл бўлишини сўраб дуо қилдилар. Ўша дуоларидан кейин эчкилар шундай кўп болалаб, шундай кўп сут бера бошладики, пировардида бир нечасини Мадина бозорида сотишга тўғри келди.